

UCAPAN PERDANA MENTERI SEMASA MENGGULUNG
PERBAHASAN DI PERHIMPUNAN AGUNG UMNO YANG
KETIGA PULUH SATU, DI NIRWANA BALLROOM, HOTEL
HILTON, KUALA LUMPUR PADA 6HB JULAI 1980

Bismillahir-Rahmanir-Rahim.

Saya bersyukur kehadiran Allah Subhanahu Wata'ala kerana dengan taufiq dan hidayahNya kita telah dapat bersama-sama menjayakan Perhimpunan Agung UMNO yang Ketiga puluh satu ini.

Saya tidaklah berhajat hendak menjawab satu persatu perkara-perkara yang telah dibangkitkan. Setengah-setengah isu yang dibangkitkan telahpun dijawab oleh rakan-rakan saya. Oleh itu, saya akan menyentuhnya secara menyeluruh.

Sebelum saya mengemukakan pandangan dan jawapan terhadap perkara-perkara yang telah dibangkitkan, saya terlebih dahulu hendak mengucapkan tahniah kepada Ketua-ketua dan Naib-naib Ketua serta lain ahli-ahli Exco Pergerakan Pemuda dan Pergerakan Wanita yang telah dipilih.

Perbahasan yang telah diadakan selama tiga hari di atas usul-usul yang telah dikemukakan merupakan sumbangan yang besar kepada perjuangan Parti. Di dalam suasana yang "serious" dan disulami dengan gelak ketawa, kita telah berjaya membincangkan isu-isu yang penting serta melahirkan pandangan dan pendapat kita secara jujur dan berterus terang. Kita telah dapat menumpukan sepenuh perhatian kita kepada isu-isu yang penting yang melibatkan perjuangan Parti kita dan kepentingan masyarakat Melayu amnya. Kepada semua perwakilan yang telah menyumbangkan pandangan dan pendapat mereka serta mengemukakan syor-syor yang membina, saya mengucapkan setinggi-tinggi penghargaan. Semua pandangan, pendapat dan syor-syor ini telah diambil ingatan. Tindakan yang sewajarnya akan diambil.

Saya merasa amat terharu dengan semangat dan minat serta faham di atas kebimbangan yang telah dilahirkan oleh para perwakilan. Semangat, minat dan kebimbangan ini telah meningkatkan lagi hasrat dan azam saya dan rakan-rakan saya di dalam

Kerajaan terhadap tanggungjawab dan kewajipan kami. Sukalah saya memberi jaminan bahawa pucuk pimpinan akan menunai dan melaksanakan segala tugasnya dengan semangat penuh dedikasi serta dengan lebih bersungguh-sungguh sejajar dengan hasrat dan aspirasi ahli-ahli Parti khususnya dan rakyat amnya. Saya menganggap bahawa semua sungutan dan kritik yang dilahirkan telah dikemukakan secara jujur dan ikhlas dengan tujuan memperkukuhkan lagi perjuangan Parti di masa-masa yang akan datang.

Di dalam ucapan dasar saya, saya telah menjunjung sembah bagi pihak Perhimpunan Agung ini serta bagi seluruh ahli-ahli UMNO, mengucapkan tahniah Kebawah Duli Yang Maha Mulia Seri Paduka Baginda Yang di-Pertuan Agong sempena istiadat Pertabalan Baginda. Saya hendak memaklumkan bahawa semalam saya telah menerima sepucuk warkah daripada Seri Paduka Baginda, menyampaikan rasa terharu, penghargaan dan ucapan terima kasih Seri Paduka Baginda di atas ingatan kita itu.

Tuan-tuan dan Puan-puan sekalian,

Di dalam ucapan dasar, saya telah juga menyentuh perkara-perkara yang berhubung dengan politik, konvensyen UMNO, ekonomi, pembasmian kemiskinan, perbadanan awam, jentera pelaksanaan, pelajaran, agama, dasar luar, pertahanan dan peranan Parti. Pada hemat saya, perkara-perkara ini adalah di antara perkara-perkara yang penting pada masa ini yang harus diberi perhatian. Ini tidak pula bermakna bahawa perkara-perkara yang tidak disentuh, misalnya, dadah dan dasar kebudayaan kebangsaan merupakan perkara yang kecil atau dipandang ringan. Kedua-dua perkara yang penting ini memang sudah mempunyai dasarnya dan sentiasa diambil berat oleh Kerajaan.

Masalah dadah memang telah selalu diperkatakan kerana ia merupakan satu ancaman kepada ketahanan negara. Ia boleh melemahkan semangat individu dan masyarakat dan seterusnya ketahanan kita. Kerajaan telah berulang-kali menegaskan keburukkan dan bahaya dadah kepada masyarakat dan negara. Kerajaan telah mengambil berbagai tindakan bagi mengatasi masalah yang "serious" ini. Di antara tindakan yang telah diambil ialah menubuh dan memperkukuhkan lagi Biro Narkotik Negara, menggalak dan memberi sokongan kepada Pemadam untuk meluas dan mengembangkan kegiatan-kegiatannya, menambahkan bilangan pusat-pusat pemulihan dadah dan seterusnya mengambil

tindakan yang keras terhadap mereka yang terlibat dalam penyalah-gunaan dadah termasuklah mengenakan hukuman mati kepada pengedar-pengedar dadah yang didapati sabit melakukan kesalahan ini.

Mengenai dengan Dasar Kebudayaan Kebangsaan, asas yang kukuh telah pun diwujudkan dengan berpandukan kepada keputusan-keputusan Kongres Kebudayaan Kebangsaan tahun 1971. Di antara persetujuan Kongres ialah :

- (i) Kebudayaan Kebangsaan rakyat adalah berteraskan kepada kebudayaan rakyat asal rantau ini;
- (ii) Islam adalah menjadi unsur terpenting;
dan
- (iii) Di mana-mana yang sesuai dan wajar, unsur-unsur kebudayaan asing disesuaikan kepada Kebudayaan Kebangsaan.

Asas-asas kebudayaan kebangsaan seperti yang saya sebutkan itu adalah perkara yang terpenting di dalam usaha memperkuatkan perpaduan dan ketahanan negara. Hakikat ini hendaklah difahami oleh semua lapisan rakyat dan perkara ini tidak harus dipertikaikan lagi.

Pada hemat saya, perhimpunan ini telah berjaya mengemukakan masalah-masalah yang dihadapi oleh rakyat, khasnya ahli-ahli Parti dan masyarakat Melayu amnya, di samping melahirkan perasaan bimbang dan kecurigaan ahli-ahli UMNO dan masyarakat Melayu, jika masalah-masalah tersebut tidak diatasi dan diselesaikan. Setengah-setengah daripada pandangan telah disuarakan oleh para perwakilan dengan semangat penuh perasaan dan berapi-api. UMNO, sebagai Parti yang mendokong Kerajaan adalah bertanggungjawab melindungi hak-hak dan kepentingan masyarakat Melayu. Tetapi, dalam memperjuangkan kepentingan ini, UMNO tidak perlu melaung-laungkan kekuatan kita atau pengaruh kuasa kita sehingga boleh menakut-nakutkan rakyat dari lain-lain kaum atau menimbulkan kebimbangan mereka itu. Sebagai Parti yang bertanggungjawab. UMNO mestilah juga sedar terhadap kewajipannya mengekal dan memelihara kestabilan politik, keselamatan dan keamanan. Sikap bertanggungjawab Parti kita, serta kesedaran

Parti kita terhadap kepentingan dan kebajikan rakyat lain-lain kaum telah membolehkan kita berjaya mengekalkan kedudukan UMNO selama ini sebagai Parti teras Kerajaan.

Dalam memperjuangkan hak-hak dan kepentingan masyarakat Melayu, UMNO yang memegang teraju Kerajaan juga bertanggungjawab terhadap kepentingan keseluruhan rakyat negara ini. Hakikat inilah yang menjadi salah satu faktor yang penting yang memberi keutuhan dan kekukuhan kepada kita sebagai Parti yang memerintah bersama-sama dengan rakan-rakan kita di dalam Barisan Nasional. Kematangan dan sikap bertanggungjawab kita inilah yang menjadikan kita disegani, dihormati dan diberi kepercayaan.

Semenjak ditubuhkan, UMNO telah dapat melahirkan pemimpin-pemimpin yang matang, bertanggungjawab, pragmatis, bersopan-santun serta yang berpandangan luas dan jauh. Ini adalah hasil dari kematangan ahli-ahli dan sistem pemilihan kepimpinan sebagaimana yang termaktub di dalam Perlembagaan dan peraturan Parti. Ini adalah asas kejayaan kita yang telah membolehkan kita mengekalkan pengaruh dan kekuatan Parti kita. Kita mesti sentiasa sedar di atas hakikat ini. Pada hemat saya, falsafah kepimpinan yang telah kita amalkan selama ini perlu dikekalkan bagi menjamin keutuhan dan perpaduan UMNO. Terpulanglah kepada kebijaksanaan ahli-ahli UMNO sendiri bagi menentukan sama ada hendak terus mengekalkan cara dan perwatakan ini.

Dalam pemilihan pemimpin Pergerakan Pemuda dan Wanita, mungkin ada pihak-pihak yang berpendapat bahawa terdapat titik-titik perpecahan di dalam parti. Persaingan pasti berlaku di dalam pemilihan pemimpin di dalam sistem demokrasi Parti, tetapi sebagaimana yang menjadi tradisi parti kita, persaingan lazimnya berakhir setelah keputusan diumumkan. Selepas itu, semua ahli dan penyokong Parti kembali bekerjasama bagi meneruskan perjuangan Parti.

Akhirnya, saya mengucapkan terima kasih dan penghargaan kepada Pengerusi dan Timbalan Pengerusi di atas sumbangan mereka dalam bersama-sama menjayakan perhimpunan agung ini. Kepada Setiausaha Agung UMNO dan lain-lain pegawai kakitangan Ibu Pejabat UMNO, serta mereka yang terlibat dalam perhimpunan agung ini, saya bagi pihak seluruh perwakilan,

mengucapkan terima kasih dan penghargaan. Sehingga kita berjumpa lagi di tahun hadapan, saya serta lain-lain Ahli Majlis Tertinggi, mendoakan para perwakilan sekalian selamat pulang ke tempat masing-masing.

Wabillahi-taufiq Wal-hidayah, Wassalamualaikum Warahmatullahi-Wabarakatuh.